

Qinnuteqartoqartillugu qinnuteqartup qinnuteqarneraniit ullut qulit qaangiunneranni qinnuteqartoq allamik nalunaarfigineqarsimangippat qinnutigineqartup inatsisitigut akuerineqartutut isigineqartalernissaa anguniarlugu Kalaallit Nunaannut suliffissarsiortut killilersimaarneqarnissaat pillugu Inatsisartut inatsisaanni § 6 imm. 3 allanngorteqqullugu Naalakkersuisut peqquneqarnissaannik Inatsisartut aalajangiiffisassaattut siunnersuut

(Inatsisartunut ilaasortaq Randi Vestergaard Evaldsen aamma Justus Hansen, Demokraatit)

Akissuteqaat

(Aatsitassanut Suliffeqarnermullu Naalakkersuisoq)

Aappassaanneerineq

Inuussutissarsiornermut Aatsitassanullu Ataatsimiittialiap siunnersuutip suliarineqarnerani sukumiisumik suliaqarnerannut Naalakkersuisut sinnerlugit qutsavigaara. Maluginiarpara inatsisissatut siunnersuut ataatsimiititaliamit isumaqatigiittumit inassutigineqartoq.

Kalaallit Nunaanni nunamiinnissamut sulinissamullu akuersissutit pillugit suliassat suliarineqartarnerisa annikillisinnissaannut sunniuteqarluarnerulersinnissaannullu periarfissat pillugit Naalakkersuisut danskit oqartussasuinik suleqateqarnerannut Ataatsimiititaliap annertuumik soqutiginninnera paasillugu nuannerpoq. Siunnersuutip siullermeerneqarnerani akissuteqaammi taaneqartutut Savalimmiut suliassaqaarfimmi inatsisinik qasukkartitsisimavoq, aammalu nunanit allamiunut inatsisip qasukkartinneqarnera, ilanngullugit nunanit allamiunik sulisussarsiornissamut qinnuteqaatinut suliarinninnermut piffissap atorneqartartup sivikillisinnissaanut Savalimmiuni oqartussat sunik suliniuteqarsimanersut, pillugu misilittagaat (pitsaasut taamatullu pitsaanngitsut) paasiniarniarlugit, Savalimmiuni oqartussanik aasap ingerlanerani oqaloqateqarnissaq Naalakkersuisut pilersaarutigaat.

Misilittakkat taakkua aallaavigalugit, Kalaallit Nunaannut nunanit allamiunut inatsit pillugu peqqussutip nr. 150, 23. februar 2001-imeersup, iluarsaattariaqalersup, naleqqussarsinnaanissaanut danskit oqartussaasuinik suleqateqarnek, Naalakkersuisut ingerlateqqinniirpaat.

Sulisitsisut nunaqavissunik suliffeqanngitsunik sulisussarsinnaanissamut aqqutissat sunniuteqarluarnerulersinniarlugit Naalakkersuisut suliffissanut qarasaasiami paasissutissaasiviup www.suli.gl pitsaanerulersinnissaa sulissutigaat, taamaalilluni suliffeqanngitsut tamarmik suliffissanut qarasaasiami paasissutissaasivimmu CV-minnik

ikkussisassallutik. Tamanna sulisitsisut nunaqavissunik piukkunnartunik sulisussarsiorsinnaanissaannik pisariinnerulersitsissaaq. Peqatigisaanik suliffeqanngitsoq toqqaannartumik nalunaarfigineqarsinnaassaaq, assersuutigalugu sanasunut mesteri sanasumik sulisussarsiorpat.

Ataatsimiititaliaq peqatigisaanik aperivoq ”[...] nunami allamioq ilaqtutaminik orniilluni najugaqarnissamut akuersissuteqareersoq Kalaallit Nunaanni sulumalluni sulisinnaanermut akuersissummik qinnuteqaqqaartariaqanngitsoq.” Tamanna eqqorpoq aammalu katissimallugu aapparisaq / inooqatigisaq atuuttumik nunamiinnissamut sulinissamullu akuersissummik peqartillugu taamaallaat atuulluni.

Taamatutaaq nunani avannarlerni naalagaaffimmi innuttaassuseqartut kommunimut akuersissummik peqartussaannersut, Ataatsimiititaliaq aperivoq. Taamaattussaavoq, kisianni ilinniagaqarsimasuunngitsunut aammalu inuussutissarsiutinut ilinniarfinni ilinniarsimasunut taamaallaat atuulluni, kisiannili inatsit inunnt qaffasinnerusumik ilinniagaqarsimasunut atuunnani.

Naalackersuisut ataatsimiititaliap siunnersuutaa akuerineqassasoq inassutigaat aammalu Kalaallit Nunaanni sulinissamut nunamiinnissamullu akuersissutit pillugit suliassanik suliarinnittarnerup annikillisinnissaanut sunniuteqarluarnerulersinnissaanullu Ataatsimiititaliaq akuersaartumik soqutiginnittoq maluginiarlugu.

Taamatut oqaaseqarlunga siunnersuut Inatsisartuni suliarineqarnissaanut tunniuppara.